

續修陝西省通志稿

第一百零七冊

卷二百三至二百四

續修陝西通志稿卷二百三

文徵三

奏議三

議覆伊犁將軍金順安撫蒙哈允撥庫欸疏

光緒九年三月
戶部尚書任內

閻敬銘

竊查伊犁將軍金順等奏勘分科境分別安撫蒙哈請由部庫撥欸一摺光緒九年二月二十七日軍機大臣奉旨戶部速議具奏欽此欽遵交出到部據原奏內稱前承准軍機大臣字寄八年八月初三日奉上諭清安額爾慶額奏勘分科境邊界未敢冒昧從事等情繪圖呈覽請飭妥議一摺據稱現在分界若將新約內之奎峒山及科屬之哈巴河等處分入俄界既失地利而蒙民等無地容身恐滋事端等語所奏自係實在情形該處界務崇厚貽誤

於前曾紀澤力爭於後既定新約祇可就原圖應行勘分之處力與指辯酌定新界金順等務當懷遵六月二十一日諭旨詳慎商辦無庸另行交議至圖中黃綫以西蒙民哈夷約有若干應如何擇地安插籌款撫恤之處並著清安額爾慶額會商金順升泰悉心妥籌具奏惟分界期迫一時恐難就緒應由金順升泰知照俄國分界大臣量議推展以期勘定之後彼此得以相安並由總理各國事務衙門照會俄國使臣並知照曾紀澤轉咨辦理將此由五百里各諭令知之欽此遵旨寄信前來並恭奉六月二十一日上諭一道跪讀之下自應懷遵妥籌迅速舉辦奈黃綫以西爲蒙哈所居約計三萬餘衆必先將東蒙哈所居游牧詳細履勘再行移西就東果否能全行安插尙難預定待明歲春暮夏初即馳往料理約於五月即可勘分邊界業經知會俄使會同舉辦再哈薩

克決不回塔懇求收撫若不俯如所請必致散漫生事故准其擇地安插並令一律改裝蓄辮庶於俄屬哈薩克有別該頭目均已樂從惟查蒙民向以牧養爲生前遭回亂所遺牲畜倒斃殆盡其東界蒙民牲畜現存無幾而西界爲尤甚盡奔哈巴河一帶遍覓可耕之地現聞勘分地界堅不肯讓前經派員善言開導人心究未能盡服者揆厥由來該蒙民必以今日之撫卹祇能振救於目前終恐無濟於將來深思久計惟有籌款購買牛羊散給以資牧養前據烏梁海散秩大臣等稟報西界蒙民男婦計約七千餘名內有牲畜者一千數百名又除嬰孩約七百餘口無庸議卹外其餘無牲畜者五千餘名擬按每二名賞給乳牛一隻每一名賞給乳羊五隻以備牧養且磚茶乃蒙民必不可少之物每名酌給一塊以資食用再查西界哈夷約計二萬餘人東界蒙民其中貧苦

者尙未計其多寡亦當量加撫卹惟思撫恤蒙哈採買牲畜磚茶暨勘分境界隨帶文武員弁兵役人等裹帶口糧雇備駝馬腳價以及盤川賞號並建立牌博工料等項約需銀七萬兩亟請飭部無論何款先行籌撥一面具奏一面派員赴部請解以濟要需儻不敷用再行隨時奏請統俟完竣詳細據實造冊報部等語臣等查蒙古哈薩克族類繁多雜處已久且屢被兵荒困苦已極今欲勘分邊界必先籌安撫之資際此時勢多艱庫儲未裕近年由部墊發各處軍餉現在欠還者已積有四百餘萬兩之多若仍紛紛請撥庫款實有不支之勢然覈其所奏購散牛羊爲謀生之計賞給磚茶爲日用之需以及勘分境界隨帶文武員弁兵役人等裹帶口糧雇備駝馬腳價並川費賞號建立牌博工料等項所費不貲自係實在情形臣等公同商酌庫款現雖支絀然事關邊務不

得不先其所急擬請暫由部庫另欸存儲四成洋稅項下提撥銀
七萬兩以資應用如蒙俞允當俟該將軍等派員領取時即由臣
部剗知銀庫照數給發總理各國事務衙門查勘分科境應將蒙
哈各民豫籌安撫業經臣衙門據情照會俄國使臣緩期分界並
知照該將軍等妥辦在案茲既由戶部准撥四成洋稅以爲安撫
之需該將軍等自應懍遵前奉諭旨妥速辦理以重界務而符新
約並請飭令該將軍等共體時艱撙節動用不得恃庫儲爲有著
之欸冀再續撥倘因欸項不繼以致貽誤事機關繫殊非淺鮮至
採買牛羊磚茶數目並時估價銀若干均當切實購辦隨時奏明
報部立案藉備查覈而杜虛糜再此摺係戶部主稿會同總理各
國事務衙門辦理合併陳明伏乞聖鑒

光緒朝東華續錄又
按疏入得旨如所議行

議覆左中允崔國因奏度支日絀請力挽積習疏

光緒十六年
六月協辦

大學士內
書任戶部

閻敬銘

竊於光緒十年四月二十五日奉上諭詹事府代奏左中允崔國
因奏度支日絀請實事求是力挽積習一摺所陳各條不爲無見
著戶部覈議具奏欽此欽遵由內閣鈔出到部查原奏所陳八條
一曰敦節儉臣等伏維我朝列祖列宗儉德相承二百餘載我皇
太后皇上仰體列聖詒謀躬行節儉光緒四年二月奉懿旨裁減
宮闈用欸節省浮費以爲晉豫賑需九年八月奉懿旨將中秋節
應進欸項五萬兩撥抵順直賑需儉德昭垂中外共仰方今庫欸
支絀國用未充尤當崇尚樸實力戒奢華欲清其源自貴者始相
應請旨通飭內外大小臣工屏除浮靡共挽頹風富者圖匱於豐
貧者量入爲出庶幾家給人足民生厚而風俗純矣一曰講農政
查原奏所稱專指墾荒一節臣等查光緒四年四月御史彭世昌

條陳備荒摺內重農事勤開墾兩條當經奉旨頒發各省妥籌辦理五年十月臣部議覆侍講王先謙條陳墾荒摺內請旨飭下各省督撫限三個月將荒熟田地開單奏咨報部並安定勸懲章程奉旨允准通行各省六年正月臣部奏籌餉十條摺內第一條嚴催各省墾荒並令將如何辦理開墾之處專案奏咨報部當經奉旨令各督撫振刷精神悉心經畫等因各在案是墾荒一事臣部疊次所議實已詳細嚴明而奉行仍在州縣督催仍在上司歷年來各省尙未舉辦以致地畝尙未復額應再請旨嚴飭各督撫查照臣部疊次議奏各案認真率屬竭力整頓悉復舊額足國裕民之本不外是矣一曰重倉儲臣等查同治三年奉上諭嗣後各省常平社倉責成各督撫大吏認真整頓廢者復之缺者補之並通行各督撫查明據實覆奏等因欽此六年十月奉上諭給事中夏

獻馨奏設立義倉一摺著各督撫申明舊例酌議章程廣設義倉實力奉行等因欽此光緒二年八月奉上諭鮑源深奏請飭各省捐備倉穀以濟荒歉仿照江南豐備倉之法勸民遵辦地方官不問其出入以杜擾累著各督撫體察情形飭屬辦理等因欽此四年二月奉上諭給事中崔穆之奏整頓各省倉穀一摺著各督撫飭屬將倉穀陸續買補務期足額勸諭紳民次第興舉如能著有成效並准其奏請獎勵等因欽此四年四月御史彭世昌條陳備荒摺內裕倉儲一條法良意美便於施行當經奉旨頒發各省妥籌辦理五年七月奉上諭御史卨純嘏奏積穀備荒一摺著各督撫仿照常平社倉之意飭令民捐民辦不准吏胥經手以杜擾累等因欽此五年十二月奉上諭御史章乃畚奏請飭舉行社倉一摺著各督撫轉飭州縣一律興修或藉資民力或酌提公項著察

度情形奏明辦理等因欽此是倉儲一事亦不啻三令五申現在惟山東舉行積穀數十萬石各省尙未一律奏報應再請旨通飭各督撫恪遵歷年諭旨認真率屬實力奉行儲積於平時庶荒年可以無患矣一曰修鹽政臣等查上年十月議覆御史桂霖妥籌良法摺內臣部將各省鹽務凡奏咨有案者分別逐一查詢其未經報部或有流弊之處令各督撫實力整頓認真裁除附片具奏奉旨依議欽此此外如緝堵私梟減輕成本革除陋規裁減浮費嚴定考成招商認辦懸岸依限造報奏銷各節近年來歷經臣部奏請奉旨飭辦者亦不啻三令五申與該中允所奏大畧相同應再請旨飭令管理鹽政各督撫嚴飭運司各道及鹽務各員查照臣部歷次所陳極力講求搜求積弊總期恤商裕課因地制宜庶幾力振頽綱鹺務日有起色矣一曰查關稅臣等伏查關稅一項

正額盈餘均有定額同治五年九月奉上諭蔣益澧奏查明太平關稅務積弊一摺著由該撫派委廉能之員幫同關道管理此外各省關務均著該管督撫監督等實心清釐等因欽此光緒五年二月臣部議覆御史黃元善請將關稅盈餘歸公摺內請旨飭下各省關嗣後務宜實力稽徵按年徵足原額此外再有多餘儘收儘解六年正月臣部奏籌備餉需一摺第三條內通覈關稅銀兩行令各省關除徵解足額外仍令就徵收實在情形按年量力溢解共濟時艱各等因均經奏奉諭旨欽遵行知在案至釐金一項雖非正供而自軍興以後除丁漕鹽關外實以此爲大宗經臣部於光緒二年十一月奏綜覈度支整頓財用及六年正月奏籌備餉需各摺內行令各省督撫設法整頓力杜中飽今年三月二十六日奉上諭各省抽收釐金疊經諭令該督撫等據實報部力杜

中飽乃近來釐局委員往往徇情濫委任用非人以致貪婪侵蝕百弊叢生殊堪痛恨當此庫欸支絀之時自應涓滴歸公實徵實解若非認真稽察將使億萬釐金半歸私橐實屬不成事體嗣後該督撫等務當激發天良明查暗訪設法整頓尤以責成委員爲第一要義並將各該省釐局徵收數目隨時稽覈嚴杜弊端該委員等如有侵漁及擾累情事立即嚴叅懲辦倘敢瞻徇情面袒護屬員或被人叅奏或別經發覺定將該督撫等嚴懲決不寬貸將此通諭知之欽此欽遵行知在案是關稅釐金尤爲近來要務利之所在弊不勝防應請旨飭下各省關督撫監督等懍遵前奉諭旨實力辦理務期涓滴歸公日有起色以重庫欸而裕餉源至原奏內稱出口稅重進口稅輕一節經臣部行查總理各國事務衙門據稱查條約內載新定稅則並通商各欸目日後兩國彼此欲

再重修以十年爲限期滿須於六箇月之前先行知照酌量更改若彼此未經先期聲明則稅課仍照前章完納復俟十年再行更改又進出口各稅均以價值爲率每價百兩徵稅五兩旋因各貨價減以致原定公平稅則較重擬將舊則重訂嗣於善後條約訂明進出口稅則倘有貨物名目稅則未載又不在免稅之列者仍照值百抽五之例徵稅等因均經奉旨准行在案各外國徵收他國進口之貨稅多寡不等有值百抽至五六十者中國收各外國進口之貨稅一律值百抽五當時中國不知外國情形實屬喫虧太甚但現在欲與更改稅則須俟各國修約年分始能辦理等語是進出口稅應俟復修條約時由總理衙門酌量情形奏明辦理現在應無庸議一曰重庫欸查原奏所引雍正年間查出虧欠庫欸各案皆屬相符惟所稱光緒八年五月禮親王等盤查戶部銀

庫虧短銀七百五十兩係指內庫而言當經奏明奉旨著落賠補
有案可稽並非戶部銀庫虧短該中允所言想係傳聞之誤惟查
庫欸關繫重大理宜慎守職司應請旨通飭各省督撫將軍監督
司道府州縣等凡有庫儲之責者皆當躬覈簿書分晰欸項慎考
出入嚴稽屬庫毋憚厭煩屑毋概任幕吏毋自謀營私毋瞻徇情
面交代必清虧缺即叅庶不致積累愈深賠補愈難矣一曰禁侵
吞查原奏所引雍正年間查出侵吞各案及近年張之洞查出冒
銷穀價等案皆屬相符各省錢糧正供及關卡課稅蠹吏侵吞入
已例禁本極嚴明無如舉發者少總由各省大吏未能破除情面
實力稽查應請旨通飭各省督撫認真訪察據實參辦毋忽於既
往毋徇庇屬員斯貪吏奸胥知所儆懼積弊可稍除矣一曰懲虧
空查原奏內稱浙江巡撫劉秉璋奏浙省州縣徵收錢糧一節臣

等查州縣虧短錢糧大干例禁近來視爲具文本年劉秉璋奏杜絕州縣隱匿錢糧明定章程一摺立法極爲確當臣等現擬就該撫所奏再爲嚴定處分實覈例限並將該撫所擬章程六條通行各省仿照遵辦應由臣等另行專摺詳細具奏請旨遵行抑臣等更有請者今時之急務貴生財尤重理財理財之大端有治人乃有治法以上八條內外臣工疊次條奏臣部疊次籌議加以歷年諭旨誥誡嚴明至於再四而積弊猶未盡除財源猶未充裕者皆由委員屬吏不得其人敷衍因循積重難返之故耳蓋朝廷以鉅任責之大吏大吏以庶務委之屬僚如果任用皆得其人縱不必屢頒諭旨屢煩章奏亦自能仰體聖心因時整頓若任聽不肖屬僚欺飾朦蔽墾荒積穀則視爲可緩之圖鹽務關稅釐金則視爲舊有之弊虧空侵吞庫欸則相率隱匿不肯舉發糾叅是雖臣部

屢奏定章朝廷屢降嚴旨亦不過虛文故事弊何以去利何以興相應請旨嚴飭各省督撫將軍司道監督等嗣後一切委任務當慎選廉明公正之員認真辦理庶幾人存政舉不致徒託空言矣

光緒朝東華續錄案按此疏上後得旨如所議行亦見東華續錄又緒按此疏述成案者多於議論又是一種局格然如稅釐虧空各節侃侃不撓詞旨嚴切其爲出於文介之手確無可疑故錄之

會陳覈議新疆兵餉一切事宜疏

光緒十年九月二十九日協辦大學士戶部尚書任

內

閻敬銘

竊查劉錦棠奏陳統籌新疆兵餉官制屯田情形一摺奉旨該部議奏臣部謹會同吏兵二部悉心籌議查原奏內稱規復全疆旗綠兵額應將舊有之烏魯木齊巴里坤古城庫爾喀喇烏蘇吐魯番各處旗丁歸併伊犁及伊犁將軍與塔爾巴哈台參贊爲駐防旗制合馬步勇營共足一萬餘人以六千三百人歸喀什噶爾道

屬以四千五百人歸阿克蘇道屬以六千四百人歸鎮迪道屬其
巴里坤鎮則定三千八百人等語兵部查該大臣所擬甚爲妥叶
應如所奏辦理至各處應設旗綠各兵及分駐處所宜令分晰造
冊送部並按季造報以備查覈至原奏內稱除金順錫綸兩軍外
臣與張曜所部共計二萬七千五百餘員名臣已將董字定遠蜀
軍改營爲旗裁併二千張曜之嵩武軍擬抽裁千數百人等語兵
部查該大臣奏請改營爲旗抽裁勇數自係爲節省餉項起見應
如所奏辦理仍令將裁定各營並張曜嵩武軍應留勇丁若干造
冊送部備查又原奏內稱勇營宜仍照行糧支給約計三年之內
當可設法將舊勇裁併再按坐糧起支以馬步三萬一千人併算
馬三步七每年照行糧需銀二百九十一萬餘兩照坐糧每年需
銀二百十萬餘兩等語戶部查道光年間甘肅新疆常餉冬撥案